

第一冊

嶺上白雲集

卷一之四



830120

嶺上白雲集
十二卷
文鈔四卷

門下晚生費念慈謹署



光緒廿有三年
十月校刊訖工

嶺上白雲集

嶺上白雲集詩序

嶺上白雲集十二卷吳門陸九芝先生著前八卷

元鼎嘗

受而卒業矣今先生詰嗣鳳石同年將以全集校刊而屬

序焉

元鼎

以不文辭鳳石則固以請且曰先大夫夙嗜子

文且與子譚藝尤契子豈可無一言著其端因憶光緒乙

亥之春

元鼎

始以年家子拜先生於吳門里第先生貌莊

氣溫進趨禱如望而知爲長人名德見

元鼎

至則甚喜暇

日相與商較古今評隲術業高下語十事常有八九合者

謂神似王新城由是時有倡和之作吳中故多佳山水又

儒彥勝流往往而集

元鼎

雖俗吏亦得從先生後邕容歎

嶺上白雲集

序

一

詠以爲常其後攝篆山陽先生猶爲詩寄之所以獎勵之

者至深且厚今諸詩具存集中而先生之歿已逾十年

元

亦且頽然老矣茲來吳門與鳳石追述往舊乃若隆時

盛事邈乎其不可及有莫知所以然者輒以是撫卷太息

相對歎歎而不能已也予旣有感於曩昔往來離合之跡

而鳳石又能勤勤盡其心力以揚先人之美故爲之序而

歸之若先生純德穆行與其詩之格高韻遠卓絕古今者

諸賢之序論之詳矣故不復贅焉

光緒丁酉九月仁和春江陸元鼎謹序

嶺上白雲集十二卷吳門陸九芝先生著前八卷

原序

昔人稱詩之工歸於境遇境遇不奇則其詩未有能工者然不極其窮則亦未有能奇者也愚則謂尤必擴之以胸襟深之以學力而後足以稱工予幼時甫握管卽喜學爲詩壯而以詩友四方之士私窺其胸襟學力以定所詣之淺深蓋無有不合者去年春與吾友陸子鳳石定交郡城嘗爲余誦述其尊人九芝先生之詩時先生方鄉居繼而傳先生之命以所著嶺上白雲集畀予屬以一言序之予聞先生名舊矣受而卒業竊歎其胸襟之擴學力之深其詩不求工而自無不工先生少隨父秉鐸京江與邑人士倡和卽以能詩稱及屢擯於有司侏僚不遇年四十僅以

嶺上白雲集

原序

一

明經需次州佐中更遭夷舶之蹂躪傷寇氛之攘竊二十年來境遇之窮且奇壹發於詩其憤然不平之概怡然自得之情悉於是乎見焉讀者忽欣欣戚蓋不能測先生爲何如人也信乎其胸襟學力有不可企及者矣吾友又述先生隨侍京口值城陷蹈不測以片檄召鄉民與官軍相應銳欲以奇功自奮會與當事者不合卽拂衣去及歸借醫術以活人每見俗醫流毒未嘗不拍案起兩顴盡發赤其切于濟人蓋如此然後知先生固非無意于世僅僅稱詩之工而已抑聞之古者五十服官政先生年猶未艾一旦假尺寸柄而大有所設施正未可知吾友其爲我復先生努力加餐勿以詩人終焉是則鄉里所厚望者也時在

同治五年丙寅春正月質卿柳商賢謹序

聞之龍門史學遊歸乃宏杜陵詩律老去漸細而況卷讀
過萬豪禿且千閒府鄉關已非巨卿朋友爲命酒人綠鬢
瞥如電波幕府青袍枯作霜葉如九芝先生者乎先生神
悟惟夙靈思在髻班固能續父書顏竣獨得臣筆花萼雙
秀昵同被池靈蘭一函祕悉鍼藥方其望雲晨光話雨宵
榻典負雞次碑證鶴壽橫梁起舞狂喝月行敬舩浩唱快
乘風去芒屨千仞命便了負囊芋火一龕爲潤公留帶蓋
幾幾乎壯思颺舉逸情雲上矣無何蚩尤霧作延陀雪狂
鯀船蔽江蜺旌彗野欖槍南天時見金繪北地歲輪加以
黃巾糾氛青犢煽虐臺城雲莽麾盡墨邗溝月明笳吹
嶺上白雲集

原序

二

忽競先生撫劍疾視結纓請從磨墨草檄疾如電飛舉旗
乞饒忠與日貫所惜吹律不競飛孤正張江潮三日未來
長城萬里乃壞先生撫膺南望盡室東走山稻充食江蘼
招魂董遇罹亂猶挾書讀唐衢嗜詠都作涕零今雖烏還
故枝虺摧餘毒而落葉輕裝猶帶塵塚看花病目益甚眊
眊其能無感慨桓笛惻愴黃墟乎嗟嗟墨陽神劍非剝脫
不銛鉅黍良弩無榜槩不力如使先生偃臥家巷隔絕塵
鞅佛助學苦向平願違雖復插架之帙富逾五千問奇之
酒暇輒三兩而尺蠖潛泥安識瀛海細畫作咬奚當鈞奏
否則振翼雞樹揚聲鳳池覆韋佼之袍食白傅之粥亦不
過上賢臣頌作聖德詩十聯寫屏一寸刻燭竊恐文犧被

繡轉眇寢降之逸青皎伏構難逞搏擊之巧矣乃先生則
下帷十霜著屐幾緇從宦非宦歸田無田魯國酒樽不空
高陽接籬常倒又况趙岐搜亂何點好遊揚子潮落靜與
鷺狎富春山好閒借漁譚打桃葉之漿情波無極賦湘靈
之瑟遙峰更青故其所作嶺上白雲集天才駿發豪氣龍
上左率入陣之雄伯生斷獄之手老幹成鐵都無醜枝洪
鐘應霜不作亞響蓋鋼以百鍊柔汞以九還化也僕學味
甄盎音譎妃豨幼負一得之知長悔十年之讀乃欲布鼓
雷門炫璞鄭氏吾恐才愧元晏適貽加糞之譏文投士衡
并無覆醬之用爾同治辛未冬仲芾卿王頌蔚謹序

自負局先生登吳山采藥而郡中人士都以醫名自章白
嶺上白雲集

原序

三

劉三刺史相繼典吳而郡中人士又多以詩名其間揆荒
擲髓洞暢癥結徵祉羽宇切剝聲韻契契委棟葦葦成羣
矣惟是岐雷五診不載雲英之章晨露四始奚療鈞天之
夢有干邪之鈺而之以之補履則枘矣有裘裳之飾而之以
行雨則濡矣孤技斯易兼精爲難若夫抱膝衡宇捶琴而
歌載橐都邑懸壺而隱續枚生之章陽氣滿乎大宅誦花
卿之什陰牯驅乎中局某嘗盱衡先哲淑艾鄉範其聞而
知之者則曰薛先生生白其見而知之者則惟我九芝先
生乎先生器宇高亮資性齊敏根棋門業則以固符彪臆
飾家術則以機肇景往往模範山水絺繡雲物抗景魏晉
之表泝流唐宋之末中閒胥疏江湖跋履楚越湘江鄰鄰

結靈均之騷佩孤山亭亭軌逋翁之密想固已登高能賦
遠游成篇矣旣而枕肱奇咳源流經脉飲上池之水蹈中
聲之節三蟲療而芝粘華兩蛤剖而榆莢小鏡經一卷囊
先葉之藏書壺子三淵括養生之總論湔浣腸穢子雲流
其精思攝衛榮魄公幹疏其逸氣析詞逾湊弄毫若丸先
生之詩至是而思益深韻亦高蓋有進於何永論醫之旨
矣昌熾黃香弱歲未窺虎觀之書文舉少年敢廁龍門之
友且樹木一圍何蔚乎鄧林握雲徑寸詎膏乎秦岱然亦
嘗泛覽於鍾嶸三品之論涪翁六微之書竊謂朱干苓落
之歌謾或贅哉之舞胚胎宮律權輿樂章是猶嘗百草於
翠嬀啟三經於素女胎息之始基方齊之鼻祖風騷而降

嶺上白雲集

原序

四

戾茲漢魏蘇李導源於元始曹劉發藻于建安是又巫咸
鴻術之篇史區復逆之法秘之玉匱軌範斯存書之青囊
光燄遄發其餘陰何冶柔絲絲不揚盧劉噍殺騷騷自故
勢重於一隅道乖乎六義是又劉氏偏溫而遺寒朱氏貴
寒而賤煥是非互獲得失平參若夫剽食章句模倣音均
自唐以下殆無算數是又長兄察色仲子覘豪壹蜚母以
爲君謂烏頭而可帝略具影響遁于髣無者矣嗚呼諍好
敗則大雅云亡苟非具千古之心胸孰能綜諸家之流派
先生削偏枯傳禁要晰五色之脉雕華自妍眠三關之竅
精心內徹詞非丹而常鍊痰雖美而必攻紉蘭佩茝九章
皆本草之經敷實銜華一卷盡葫蘆之訣豈非風雅之俞

踴功歌之和緩乎善乎縉雲氏之言曰訟而能別解而能
彰斯言也可以論先生之醫可以論先生之詩世有知者
當不以爲疣贅云同治辛未十二月鞠常葉昌熾拜序

嶺上白雲集

原序

五

元 陸九 先生 遺像
後學 王雍熙



猗歟 先生古之君子亦仕
亦隱 涅而不滓甄綜故言貫
達要旨抱道在躬著書盈尺
夢歲徵蛇過庭詔鯉司成孔
碩紹聞蔚起遺編寫定高山
仰止垂芳億齡播之淳史

光緒丁酉冬初後學汪鳴鑿謹贊并書



嶺上白雲集目錄

卷一 癸卯至 壬子 古近體詩六十三首

卷二 癸丑 甲寅 古近體詩七十三首

卷三 乙卯至 戊午 古近體詩五十五首

卷四 己未 庚申 古近體詩五十七首

卷五 辛酉至 癸亥 古近體詩五十六首

卷六 癸亥 甲子 古近體詩五十一首

卷七 乙丑 丙寅 古近體詩五十首

卷八 丁卯至 己巳 古近體詩五十一首

卷九 己巳至 辛未 古近體詩五十二首

卷十 壬申至 戊寅 古近體詩五十二首

嶺上白雲集 目錄

卷十一 己卯至 辛巳 古近體詩七十四首

卷十二 辛巳至 丙戌 古近體詩六十五首

卷十三 丁亥 戊子 古近體詩五十一首

卷十四 己丑 庚寅 古近體詩五十二首

卷十五 辛卯 壬辰 古近體詩五十三首

卷十六 甲午 乙未 古近體詩五十四首

卷十七 丙申 丁酉 古近體詩五十五首

卷十八 己亥 庚子 古近體詩五十六首

卷十九 壬辰 癸巳 古近體詩五十七首

卷二十 甲午 乙未 古近體詩五十八首

嶺上白雲集目錄

嶺上白雲集卷一

元和陸懋修九芝著

男潤庠鳳石校

潤州學舍讀書同家孟翰香作

吾聞不羈才貴得山川秀潤州古名區勝概東南首鐵甕
俯大江金焦聳高岫人物盡奇雄髦賢出華胄家君此秉
鐸諸生集薪樵葉密花自繁烏歸爲林茂趨庭隨阿兄讀
書共清晝剛柔析經史古今釋隸籀句爭競病聯韻亦尖
又鬪並轡發首塗策蹇效馳驟校才不逮兄三十里常後
顧名義可思媵修願加懋賦質本愚蒙劬學免孤陋初但
涉樊籬漸乃窺徑竇探奇必宛委窮源到星宿宋楮刻未
成強顏事雕鏤一得亦筌蹄何能薄釘飯且喜厯名都不
嶺上白雲集 卷一

俎豆

邵伯揚

廷烈

丈齋中觀益山命賦

遨遊志五嶽方馳城外觀一造丈人室忽有飛來山開軒
愜幽賞消此永晝閒挈瓶瀉新水巖瀑鳴潺潺爐香散一
綫煙雲繞座間小松不盈尺細草如帶環濃翠漸欲滴高
下堆螺鬢危橋隔絕磴古洞門常關溪流杳然去何處桃
花灣尋源別有路此境非塵寰

詠雪用東坡聚星堂韻

北風一夜打枯葉釀雨不成釀成雪今年一冬晴日多用成
得此冷趣更清絕蠟屐欲訪前邨梅雪壓花欹不堪折

花開如雪雪如花兩兩清光互明滅門外須臾三尺高空
階一白纖塵掣琉璃爲屋晶作屏眉宇生寒眼生纈信是
吳縣作地衣疑向空中飛玉屑溪橋曲折望中迷高下隨
風勢飄瞥疏才未敢鬪尖又白戰何妨託前說呵凍詩成
籠袖看研水成冰筆如鐵

城東門謁張中丞廟

漁陽一夕驚鞞鼓胡騎長驅入中土二十四郡無堅城一
片降幡出迎虜此時大地塵飛揚慟哭惟有中丞張義旗
獨建誓殺賊賊無所懼惟睢陽睢陽城外賊方悍睢陽城
中民不渙三月食盡餉莫繼吞茶齧紙呼誰援援絕孤城
就死時臨淮譙郡皆全師遙遙制賊惟一旅公之奇節誰
嶺上白雲集

卷一

二

能知我聞公事識公意死守豈云事必濟使賊併力圖東
南庶幾西北弛其備朔方兵集晉水清得教李郭功能成
當時事勢豈不爾收京何必非中丞摩挲碑碣動懷惋千
秋浩氣昭雲漢卽今西夷方肆饕猶望靈旂捍民患

金山留雲亭望江

潯陽九派來滔滔秣陵瓜步掀波濤長江到此勢一折江
中壁立金山高幽人往往此游覽中流一葉浮輕舸有亭
翼然名留雲雲氣直上千層霄到此腰腳更强健游興欲
比東坡豪悲歌忽憶昨年事帆檣千百停夷艘乘風高艦
疾鷹隼轟雲巨礮驚螭蛟爾時督師知何人旌旗不動徒
逍遙但聞制挺有鄉約麻繩縛賊江中拋感觸往事皆幾

裂閃閃欲動腰間刀歸來重過戰時地白日驂黯風蕭騷

金山三宿後同人復有焦山之遊卽用東坡自金山

放船至焦山韻

臨江山水皆足耽自來名勝尤江南獨行已足快遊賞勝
侶况更聯兩三拈題分韻發豪興下筆食葉聲如蠶我遊
金山快三宿焦山未到能無慙清晨鼓棹徑渡江破浪欲
忘驚龍潭遠望林嵐雪初霽琉璃滿眼神彌耐相逢衲子
話眞俗啜茗儘足供清談長松盤翠繞石磴澄波漾碧搖
銅龕齋鐘粥鼓聽互發蔬筍足傲羅肥甘故鄉山水縱稱
好如此風月情尤貪剔銘摩鼎興未已探幽陟險吾猶堪
那得塵纓便澣濯重來許結青松菴

嶺上白雲集

卷一

三

揚州

春到蕪城草又薰才名爭訪鮑參軍我來時已花朝過只
問揚州月幾分

翰香兄歿一年矣賦此當哭

去年都爲浮名誤一夕遲歸隔死生從此入門誰喚弟有
時失口尚呼兄哀絃挂壁淒餘響隻雁銜蘆悵獨行怕向

牆根重剔薜蘿舊時刻影不分明

幼與兄同學每晨入塾常於西牆刻日影以驗遲蚤

兩世鵝原同抱恨卅年一夢首空回重泉妻女應相見高

閣文章忍再開肯信今生斷消息終疑久出有歸來側聞

長老悲蘭玉祚薄難於得此才

蘭陵曉渡

客夢醒輕燒耿耿天欲曙近市聞人聲不知到何處

治芳濱觀競渡

燭龍一道水上來船頭伐鼓聲如雷一龍瞥交一龍去似龍非龍心疑猜五光十色翻水立照見面面船窗開花光鏡影壓香霧深杯勸客傾香醅海湧繁會數重五南油西漆誇多財君不見貧女機絲織午夜鐙寒蘿屋光徘徊

夏夜

開軒下庭除明月瀉滿地蘆荻生微涼水中有秋意

效顏延年五君詠

阮步兵

嗣宗性豪放禮法若脫屣簡默乃自矢人物無臧否途窮

嶺上白雲集

卷一

四

輒引痛沈涵甘世鄙往復詠懷篇憂思何能已

嵇中散

偶世接俗子本非嵇公能胡與王烈遊不得共飛昇流傳廣陵散哀音徒泠泠悠然千載下頑懦還當興

劉參軍

參軍乘鹿車所往但適性泊然既寡營何用善辭令壺酒常獨攜荒謾豈足病生有一鍾知名自沒世盛

阮始平

仲容廊廟姿乃為始平郡啟事雖屢登壯志終莫奮雅樂久淪亡古音孰能問徒負山郭知寂寞慨世運

向常侍

向秀暢元風營營恥名利灌園若終身讀書得大意交游
嵇呂閒落落自矜異一感山陽居臨風爲隕涕

秋夜聞雁

到眼秋光已斷腸況聽嘹唳下瀟湘西風又白汀洲路滿
地蘆花雁一行

松江吳少白

長庚

以悼亡詩見示并屬題其配沈夫

人遺像

碧城深處紅樓窈一片仙雲總環繞仙家眷屬自風流秦
鳳吳鸞世原少便欲翻成碧落緣一生長住四禪天拈花
卻爲閒情重謫向紅塵作散仙紅塵小謫渾閒事管領春
風住人世謝韞原饒林下風王郎亦自多才思如君夫婦

嶺上白雲集

卷一

五

幾生修天上銀河傲女牛十年占盡繁華福不解垂楊望
陌頭海氛驀地羊城起東南半壁無堅壘累人夫壻病兼
愁猶望蛟龍夜深徙更番風鶴盛傳訛江湖到處浪花多
動地鼓鼙森玉帳連天兵燹偪金戈一夕舟山告失守江
南又陷吳淞口自此憂深漆室人避兵遠向黃河走問道
倉皇亦比肩龍城小住忽經年經年烽火銷亭堠倣裝正
待還雲間無端怪鳥聲聲促情天忽起罡風惡碧海難銷
萬古愁瑤華空說三生約一病深閨竟不支纏繇藥裏命
如絲可憐錦襁兒猶乳已是蛾眉撒手時此時花月皆無
色此際雨風更蕭瑟痛絕黃門幾斷腸仙山何處追靈匹
八天從此路漫漫蹀躞歸程淚不乾生憎九曲黃河水送

過明妝送玉棺分明隔歲來時路歎息今番不同渡慧光
倘不化幽燐魂魄還歸舊時處舊時妝閣無人開玉階落
葉紛塵埃幃屏髮髻盡如故營齋營奠肝腸摧簞牀此夕
重安置夢魂冀以精誠致恨煞鴻都術未傳愁來宛轉埋
無地埋愁無地又經時天付多情總合癡歌離弔夢酸辛
語記取鸞綰本事詩詩成觸緒都成感愁根不共秋雲斷
半幅驚鴻小影留攜來時向風前展索我題詩記悼懷一
書遠寄江頭來郵筒縱有新裁句不及江頭驛使梅昨冬
遇我胥江許讀盡君詩識君苦小別匆匆又一年馳書常
勸加餐努卽今下拜卷中人省識鰥魚淚尙新欲師秋水
蒙莊意持慰荀郎多病身

嶺上白雲集

卷一

六

秦淮櫂歌十六首

六朝金粉問何存幾度來遊白下門宮殿三千樓十四秋
風秋雨總銷魂

魚鳥華林迹已陳樂游冠蓋盡荒塵千秋興廢尋常事十
里清淮尙姓秦
雙扉白板冷斜暉遺宅當年說陸機悔煞華亭聞鶴唳秋
風不共步兵歸

故址重尋王謝堂烏衣門巷傍垂楊舊時燕子飛何處賸
有行人話夕陽

渺渺春江送別情桃家姊妹舊知名渡頭流水依然綠無
復王郎打槳迎

宵來景色最淒迷
落月寒煙烏亂啼
留得南朝江總宅
門前猶繞舊青溪

蘭漿閒停曲水隈
波光月影共徘徊
傍船已少鷗三兩
那得桓伊弄篴來

風景蕭蕭認得無
秋來處處長菰蒲
賞心亭子還臨水
誰挂袁安臥雪圖

臨春結綺半煙消
珠翠沈檀恨未銷
唱到後庭花一曲
景陽井畔雨瀟瀟

一鉤新月挂彎環
步步金蓮去不還
依舊高樓凌百尺
更無人唱念家山

南渡江流弔夕陽
春燈燕子費平章
飄零法曲何人按
腸嶺上白雲集

卷一

七

斷當筵脫十娘

短短疏籬插竹斜
荒園還記寇娘家
重門深鎖無人到
一樹棠梨自著花

良辰美景奈何天
拍到紅牙一黯然
珍重侯生書一紙
癡情贏得美人憐

翦燭清談酒易酣
不堪重與話江南
卽今流水秋光裏
誰弔詩人紀阿男

金樽銀燭宴誰家
丁字簾前月半斜
無那客中聽不得
一聲水調雜琵琶

紅板橋頭好放船
絲絲楊柳淡含煙
情長情短何須問
那有柔條似昔年

落解後寄里門諸子

眼前事事付閒評轉悔詞場浪得名一段鄉心黃葉路瀟瀟風雨滿江城

自丹陽至常州

行過長隄又短隄曲阿東下夕陽西江連揚子流還濁路入毘陵岸漸低地力儘堪分市物鄉音獨不辨兒啼扣舷歌罷重題句留與他年話雪泥

山行見茱萸一枝

一自人琴感罷彈至今有淚未曾乾傷心我已無兄弟偏有茱萸到眼看

吳江舟夜

嶺上白雲集

卷一

八

水程入夜靜卽景化爲詩風定星猶活雲開月自移小橋依路轉獨樹過船遲坐聽宵流疾涓涓人不知

舟行書所見

家家住近太湖邊春水粼粼漲碧漣爲問生涯何處好夕陽影裏釣魚船

岸曲溪深不礙篙青青草色滿平皋宵來一雨添新漲綠樹陰濃臥桔槔

隔樹班鳩斷續啼菜花黃處麥苗齊老農不解春光好紅雨纒紛付一犁

有女攜筐陌上行柔桑枝上囀倉庚東鄰歡笑西鄰語半和祈蠶疊鼓聲

溪上觀捕魚

魴魚味美誇江東，鮮鱗躍水凌晨風。漁師大網結夜半，一舉百尾歡聲同。紛紛白小不足取，任爾脫漏泥沙中。小舟挺叉復深入，如此足令澄淵空。主人愛客呼庖人，揮刀作鱠霜飛銀登盤。食指眾俱動，縮項之鮪猶非珍。數皆有禁，自古昔飽噉何堪歎。竭澤化龍飛去知何時，赤鯉回頭自相惜。

扁舟一再來江津，風物未改波鄰鄰。揚鬐奮鬣少游衍，尙見漁子紛垂綸。須臾潭底數頭出，半已觸網傷其鱗。牽蘋戲藻憶往日，於叔之樂非其倫。自古遠庖豈無意，胡爲口腹窮滋味。主人腸客期盡歡，賴尾誰悲釜鷺棄。君不見覆嶺上白雲集，

卷一

九

巢破卵鳳不翔，剖胎劓孕麇不至。輓轡置獻千百頭，那怪蛟龍夜深避。

過尹山湖

三兩人家傍水濱，竹籬茅舍畫難成。溪痕紅瀉桃花膩，山意青延柳色勻。問價魚鰕知近市，忘機鷗鳥慣依人。扁舟野渡閒停櫂，且聽漁歌斷續頻。

南潯

昇山樹色望模糊，閒倚篷窗興不孤。舟入荅溪春正曉，分

明重展米家圖。

余家藏有米南宮荅溪春曉圖

秀水訪曝書亭故址，卽東僚靖朱襲子。

當年桃李屬公門，竹垞高風此尙存。一代文章鴻博重，千

秋名字布衣尊選樓欲問南山竹書局重開北海樽我幸

此來添韻事邢譚私誼識桐孫先六世祖以康熙乙丑第

任輿亦出公門公貽書云孟行繼年兄而魁天下僕自喜

所鑿之不謬也又家藏一札云承寄貲來為僕刊經義攷

正如歡喜阿羅漢惟有乾笑而已公餘能來作平原十日

飲乎陸肯堂請事閒雖凡入禁日每集瀛洲道古錄一書

一木斯文不幸陸生云亡至今藏諸篋行

扁豆

豆不一其類茲何以扁名託根宜水國分種到江城入夏

方滋長當秋乃發生紫英垂錯落白莢看敷榮含露涼初

秀迎風暑漸清正逢香稻熟欲並晚菘烹邨店堆盤好街

衢壓擔盈沿籬紛寄迹煮釜笑寒盟漏小譏人品偏翻驗

物情懸魚形足擬抵鵲勢相爭柏葉聊同摘蒲羹試共盛

嶺上白雲集

卷一

狙應同備物邊或是諧聲粒未鸚哥啄筐先馬料傾蠶眠

殊物候牛踏聽鄉評入藥醫經著題糕食譜成性甘堪佐

酒味淡可調羹記曲分瑤席閒談稱竹棚麥歧符瑞兆芹

獻快編氓吳俗風斯儉幽民旬共賡花開吟未已蟋蟀待

時鳴

趙子舟

棹

觀察招同陸閩栽

毓元

孝廉程曉峯

爾亨

學博研香

寅錫

上舍昆仲徧游金焦諸勝仍用東

坡自金山放船至焦山韻

探奇攬勝性所耽一舸徑發江之南江中金焦峙突兀險

怪有二原無三自餘諸峯盡環列谿衍亦復如叢蠶我於

京口住十載此不徧陟真堪慙趙公豪氣逾十丈繫楫徑

湖魚龍潭手攜鐵蓬動高唱波濤洶湧形神酣二程亦復
負奇氣與我二陸操鄉談山僧竊聽不識省攜手同坐梅
花龕清齋作供味殊適絕勝塵俗羅肥甘平生萬事視俱
淡獨於山水情深貪前生縱非龐居士搬柴運水知猶堪
會看拂衣就高座何用更結峨眉菴

病起贈內

陳安軀幹小沈約腰圍瘦臥病忽經時倚棹昧節侯不耐
秋風欺怯寒尙膚腠凭几一吟哦久坐忘宵漏山妻勸不
停何妨待明晝前此兩山游煅詩未卽就腹稟有瑯環不
得雙龍守恐有五丁來挾山與俱走走坐待筆研鈔苦索吝
弗授詩成便得佳無過醬瓿覆不如且將息功可刀圭奏
額上白雲集

卷一

十一

事有必師古七發可醫陋不見驅瘧文力可二豎鬪片檄
愈頭風還當勝符咒婦言不可從置之等悠謬須臾研匣
開筆陣頗馳驟便覺心骨舒足抵神鍼灸一詩本夙成一
詩乃新搆詩成念與聽一笑吾其又

寄題徐賦秋

誦芬

茂才秋聲館四絕句

知是城南美少年畫中風度自翩翩多應別有傷心處聽
到秋聲便黯然

睡起秋從何處尋井梧葉落識秋深定知人亦如秋冷立

盡西風瘦不禁

三秋風雨最無情暗裏流光客自驚領略人間無限恨故

應詞賦帶商聲

我正傷秋病起遲可堪此夕更題詩從來秋士無涯感說
與春人總不知

送徐花橋

起英

之官粵東

親愛如兄弟依依兩載餘高堂倚閭日游子挂帆初此會
更何日送行祇一書臨歧不相見轉免淚盈裾

品蘭曲題詞

品蘭曲者程君曉楓爲其姬人徐品蘭作也品蘭崑山
人居邑之綠葭濱年十五爲鄰女所媒陷入樂籍父母
及姊皆不知也歷半年輾轉至上海誓不辱覓死者屢
矣君之戚朱薄游遇之品蘭知其爲同鄉也涕泣求援
朱乃力爲脫籍以去時程夫人方爲君謀置造豔其事

嶺上白雲集

卷一

三

喜而聘之一時風雅爲品蘭慶得所焉

環佩聲聲人似玉洞天深鎖黃金屋從來才子慣鍾情肯
信美人多薄福美人身世勝徐孀品格清幽冠眾芳第一
人宜花第一芳名端合署蘭香蘭香綽約年三五家在崑
岡比元圃綠徧霜葭秋水濱小姑居處清如許誰知鄰女
暗中窺頓使明珠掌上摧一霎名花輕墮溷誤他鴝鳥願
爲媒情天從此罡風起海角天涯痛遷徙此時豈肯變初
心此際何難輕一死祇因阿父滯吳門阿母提攜未報恩
思親日落花前淚望姊宵歸月下魂花前月下無人識半
面妝成更淒絕鴛粟花開幾斷腸可憐心迹如冰雪冰雪
嚴寒坐夜深夜深有恨託瑤琴好憑一曲瀟湘怨彈出成

連海上心朱家俠客人間少知是鄉親誓相保黃金不惜
贖文姬白璧居然傲蘇小自此駝返故鄉木蘭仍着舊
時裳宮紗一點憐柔腕半載歸來卸豔裝豔妝畢竟誰消
受夫婿才名滿人口拈得芳蘭悟夙緣自憐紅葉成佳偶
況是閨中最有情承顏大婦亦心傾館娃不讓吳宮獨特
向花間起畫屏畫屏曲曲皆春色韻事胥江競傳說兩情
都比玉溫柔一室同饒花氣息自是三生舊有因美人香
草感靈均漫將解佩湘舉意泥煞停車石徑人

陪閩栽丈南山看紅葉

穠穠桃李花陽春恣明媚紅紫易消歇安得春常在一年
好景秋來多空山寂寞無人過楓林葉落冷如許從此領

嶺上白雲集

卷一

七

略知誰何閩栽先生得秋意芒屨竹杖秋光裏俗豔都從
冷眼看閒情獨向幽叢寄身似枯僧人定還心如井水無
波瀾搖鞭不上長安道囊得琴絃未肯彈卻來石徑停車
住坐向白雲最深處絢爛雖同二月花春人那識秋人趣
一度清游未悔遲先生懷抱尙能知笑他刻意傷春者更
有司勳杜牧之

送阮生卿月 樞 歸鹽城

似此才華未可量官齋三月快聯裳篋中遺研家聲重地
下傳經心事長除卻綱常無理學漫將帖括當文章相期
便作千秋計羞澀何妨笑阮囊

題莫釐山人碧天秋思圖

後貌香燼罷調絃短枕閒支倦未眠四壁蟻聲啼不住
天涼月浸寒煙

五銖衣薄不勝寒斗轉參橫夜向闌拂地桐陰涼似水捲
簾重倚玉闌干

涓涓涼露淡無痕寂寂空階冷閉門昨夜雨聲今夜月縱
無離緒也銷魂

無限離懷憶舊時欲從何處寄相思一庭夜色涼如許人
倚西風瘦到詩

初歸里門爲張景蘇

廷薰

題其姊錦梭孝女遺像

吾人所貴惟至情近時孝友推張生我歸鄉里乍相遇聽
談往事悲沾纓所悲何事忍重說家有進士稱不櫛不幸
嶺上白雲集

卷一

古

乃以孝女傳欲比徐家妹豈得覺覺張生絕可憐父歿姊
殉纔髫年阿母悲來憐阿弟祇餘一硯長流傳年來自抱
孝女像徧乞題詩色沮喪可堪回首趨庭時午夜唵聲斷
酬唱吁嗟乎張生有姊吾有兄同根枝葉皆敷榮我兄歿
亦十年矣聞張生語那弗涕淚交相縈

嶺上白雲集卷二

元和陸懋修九芝著

男潤庠鳳石校

癸丑新年

漫道新年勝舊年，武昌烽火又橫天。
好春慣製椒花頌，此日愁開柏子筵。
滾滾江流作嗚咽，青青草色失芊緜。
宵方聞捷朝聞警，那有懽情到酒邊。

將赴澄江以聞警止

傳來消息自心驚，如此風波不可行。
親老可堪羈簿宦，世衰何用戀浮名。
長江一失難爲險，故壘重看尚未平。
聞道潯陽方告警，小孤山已撤防兵。

避亂赴黃序

嶺上白雲集

卷二

一

頃刻傳烽徧潤州，倉皇八口赴荒陬。
平時書劍都成累，亂日舟車不易求。
放眼忽驚千里窄，傷時豈爲一身謀。
十年兩度干戈事，尚有蟲沙劫未休。

春暮書懷十二首

皇朝恩澤滿人寰，域外聲靈震百蠻。
紫氣自騰霄漢上，妖氛忽動斗杓間。
漁陽鼙鼓驚雷動，灞上旌旂映日閒。
爲問防秋諸將帥，運籌何以慰天顏。
漠陽烽火正蒼茫，又見狼奔入武昌。
北上捷書方絡繹，西來賊勢更披猖。
三秋嶺表虛傳檄，一夜吳頭盡撤防。
極目長江風浪惡，東南半壁少康莊。

龍蟠虎踞舊神州，天塹長江鎮石頭。
數萬雄師徒擲餉，一

時妙算自迴舟崔巍鍾阜雲空護鳴咽秦淮水不流獨有
張巡能報國鞞刀磨得示同儔

輪船麤聚憶江邊戎馬紛紜未十年蒿目南徐餘劫火驚
心北固又烽煙郵傳有騎空馳檄城守無兵況備邊都護
威名空絕世固山牛象去還先

隔岸蕪城帶水通流離一夕感相同祇餘楊柳無心綠那
有煙花到眼紅煮海桓寬徒作論伏波馬援漫稱雄斂財
賄賊終何益尙道韃趨術未工

黑旂揮動向家兵一誓遙傳賊膽驚昨夜將星千丈朗滿
天毒霧幾時清巴圖魯號頒誠厚邊必隆刀佩敢輕識得
聖明宵旰意肯教一路陣雲生

嶺上白雲集

卷二

二

江城何日靄光開揚勇威名亦壯哉軍令若能嚴細柳戰
功自許比雲臺全師坐擁三年久歷陣方誇百戰來草檄
青油原不易安危豈獨重邊材

老范聲名徧九州甘棠遺愛此長留鞠躬未竟先臣志報
國期分 聖主憂駿馬長鞭看整暇輕裘緩帶自風流
卽今雪涕揮軍處父老還能問故侯

艇子飛來自粵東中流擊楫漫稱功浪傳鐵鎖橫江底終
慮長鯨掣海中奮勇自誇身手好策勳不受爵官崇健兒
豈果明忠義貽忠他年正未窮

義旆飛揚耀斗牛羣思敵愾賦同仇肯貽廣武千秋歎豈
少田橫往日儔四野風塵猶劍戟終朝憤激徧鋤耨彼蚩

甘作壺漿迎願比江靈一洗羞

幾人辛苦賊中來
燐火淒迷事可哀
鼓角自偕宵月靜
旌旗不逐曉雲開
頗聞淝水閒棋局
但學東山寄酒杯
深算老謀誰識得
流民已是滿江隈

到眼瘡痍不忍看
柝聲淒絕角聲酸
頻經喪亂生原幸
暫免流離夢已安
論史早知軍律細
談兵始識將才難
同仇一賦聊舒憤
辦賊何須定據鞍

聽客言蘇州近事有懷族人書此誌慨

蘇潤一水通不及四百里
舟楫可往來
平時便行李
慨自今年春寇氛
徧江涘
八口走兵間
倉皇僅免死
竄身來荒村
瞪目但直視
命豈螻螻輕劫恐
蟲沙比有家不得歸
咫尺

嶺上白雲集

卷二

三

尺亦迢遞道逢東
來客關心問桑梓
言雖未被兵紛紛亦
遷徙且聞市廛間
錯雜多奸宄
所慮草莽中伏戎一朝起
客言猶未終
我聞已隕涕
索靖泣銅駝
王尼歎滄海
我家聚族居清貧
本如洗
時平尙艱難
顛沛况經此
我雖未能歸
念此常不止
知我故鄉人亦念流離子

贈長安沈佐唐

勳臣

參軍

策勳歷歷紀雲臺
又見江東建節來
若使短兵眞接戰
詩成應費沈郎才

側帽參軍正少年
一時才筆重南天
閨中如有人相憶
夜夜橫戈帳底眠

爲鎮江士民草討賊檄成書後

簪毫獻賦成虛願投筆從戎豈素心片檄相傳聊雪憤蘇門長嘯雍門琴

雲山題劉伯純炳勳茂才破敵芻言後

誰云江左有夷吾西域於今盡賈明知否深山風雨夜有人燒燭檢陰符

移家諫壁贈劉伯純卽題所著自怡詩後兼柬周子

如張孟能

昨日識君面今日讀君詩君詩不苟作亦不求人知乃君不我棄許我管見窺方今詩世界牛鬼途紛歧空疎固貽誚塗抹亦可嗤諒無真性情詩教誰維持君友張與周脰脰世所希道君不去口爲我言平時非徒事徵逐道義交嶺上白雲集

卷二

四

相期慨自寇氛徧瓊尾紛窮黎側身天地小何處容安棲數椽賴君覓托足雲山隈於此寄八口得免流離悲斯感良不淺豈獨在文辭願隨諸君後古道追純熙餘事論詩旨石錯功交施性情苟異人詩道卽在茲悠悠歎未俗微君吾誰師

夏日再冉又過半陣雲莽莽仍連天城中白晝有鬼哭郭

外赤地無人煙但聞參軍令公喜安得道州蒙賊憐登樓夜半望星象威弧終望能張弦

雲山

杖策山巔一慨然戰功莫問永初年千秋興廢誰同感獨

客登臨只自憐。縱目愁雲浮北極，驚心歸鳥下南天。無邊木葉蕭蕭裏，望斷金閨匹練前。

揚州鍾孝廉

江

全陵張茂才

繼庚

哀詞

乾坤浩氣存一身，兩全忠孝稱完人。匹夫溝瀆欲誰諒，殺身要貴能成仁。虎尚可刺，蛟可截，區區蟻賊焉足滅。悲哉先軫竟喪元，痛矣李陵乃援絕。紛紛借寇網，利徒焉知大義千秋扶豺狼。當道蛇臥轍，古來此患何時無。嗚呼此患何時無，如鍾君者能免乎。

孤城陷賊日已久，擊賊紛紛但以口。全師坐擁彼何人，高捲旌旗息刁斗。有人辛苦來賊中，願拚一死爲內訌。凝碧池頭有閒意，八公山下生雄風。一朝債事謀不成，暗中漏嶺上白雲集。

卷二

五

洩皆官兵常山有舌罵賊死，同仇憤恨胡能平。嗚呼此恨胡能平，如張君者死亦生。

南鄉紀事

南鄉奔走爭馳檄，人集盈千邨滿百。敢云在野非王臣，各奮鉤鉏起阡陌。向家軍令傳江頭，制挺人當後持戟。令民但助陣後威，肯遣災黎冒鋒鏑。以兵衛民敢勞民，亦豈兵威藉民力。但使各自保室家，野果能清卽堅壁。賊無所利，惟空城大軍自可城。隍逼森嚴將令，豈不然感入心脾。足銘勒，遭鐸無煩路更徇。自見戈矛誓同澤，雲臺高築彼何爲。別有奇謀不可測，徙木有示恕。執冰徵調稽名編冊籍，前茅忽後後忽前。坐使鄉團勢分析，紛更號令束濕薪。嗟

彼鄉愚那得識正是田功孔亟時鄉村四月耨耨釋礮聲
慣聽空中騰未見刀鋸試一賊連營一夕火忽紅豈果全
軍氣皆墨城中城外皆楚歌湯網能開有孽盡羊公送酒
豈飢人續命湯成足貽敵一矢未折早曳兵養寇全師計
兩得乃知必使蟻例行正爲乘風退飛鷁明朝竿木又登
場此戲何妨請憑軾咄哉鄧禹方笑人螳臂何煩怒蛙式

與楊子安

履泰

孝廉子城

元慈

茂才夜話卽別

十年作客住江城患難重經涕淚橫書劍無多艱就道干
戈正亟諱談兵變名我欲同張祿蠻語人誰重郝生此去
韓橋問遺事尙疑桴鼓有餘聲

時將過圖山
赴太平洲

自雲山移家江洲幽芳橋伯純書問近況賦此代答

嶺上白雲集

卷二

六

手風感激寄瑤函問訊嵇康總不堪爲報故人仍故我豈
能江北勝江南干時自笑屠龍技入座誰容捫蝨談獨有
未除豪氣在引杯看劍興猶酣

將有毘陵之行留宿趙生

玉芳

草堂

難得今宵共此杯相看江月逐人來得家山水庸非福能
讀春秋便是才廣絕交書羞屢作反招隱賦笑重裁祗愁
世并無楊意莫便題橋誓不回

同趙生渡江

過江名士昔風流寂寞江干此日秋欲與祖生同擊楫卻
煩南八自操舟浮雲袞袞連窮谷落日荒荒下戍樓舊日
金焦青兩點若爲放眼涕橫流

常州呈汪衡甫

本銓

方伯

兩淞旬宣有政聲風濤重試志澄清一時裘帶原儒將自
古鉤鉏是健兵延攬從容開舊閣指麾慷慨倚長城卽看
砥柱迴瀾日仍此艱難報國情

江上從軍曲四首

戰艦橫江靜不譁如雲茉莉襯紅霞半年苦竹黃蘆裏直
到今朝始見花

崑崙張宴想殊功枕劍封侯一夢中賴有當關能典客不
教壑谷洞吾公

旌旆飛揚滿釣磯數行柳色自依依楊花不解江風惡亂
逐江潮上下飛

嶺上白雲集

卷二

七

千尋鐵鎖枕江隈萬里投鞭識將才不是周郎無勝算東
風錯認自西來

爲常州保衛籌餉旋蘇又值滬濱寇警廢然而返

暫此還家不當眞得歸仍是異鄉身覆巢有客傷危卵近
突何人解徙薪鯨鱷江頭仍跋浪蛟螭海上又揚塵此來
枉作包胥哭不是秦庭贈策辰

汪方伯爲洲中五百人築上城於新闢事成感賦并

示趙生卽辭歸里

作客當平時所念猶桑梓況此際時艱寇氛近尺咫漕河
一水通蘇常倚脣齒躑躅哀江頭徬徨正無似遠聞平陽
公位望重鄉里蒿目心爲傷勞苦卽瘡痍泰山膚寸雲一

兩徧遐邇吾鄉得倚公萬戶有生理以此語趙生足可乘
時起鼓楫徑渡江仁聲已滿耳一刺甫得通公聞急倒屣
謂已久知名相見那弗喜便與上策商戰守決行止洲人
習水嬉便欲巨川濟一過楊僕船樓櫓歎空橫鴻飛遇西
風跼踖徒江水此行飽看花且聞酒香矣舍此就中策臨
河築高壘遠通馬陵道近接奔牛市洲人頗知勉努力振
鞭弭條約幸勿渝程休有前軌一旅雖云寡自足臂指使
鯁生不知兵博采媿葑菲但望所舉賢奮發報知己長揖
敬謝公還家效趨鯉待公撤防時重來歌樂只

吳程曉楓

揮手干戈裏方深別後情豈知因未疾竟使斷今生斯世

嶺上白雲集

卷二

八

正多難吾曹方苦兵君行向何處枕劍到蓉城

太息銅坑路流離八口俱重泉先弱弟遺澤付諸孤寥落
悲書局淒涼問酒壚憑棺慳一慟樹色望模糊

到家得吳江沈子鬻熊師茂才書

經年委講不論文依舊江頭雜戰氛擊楫偶然同祖逖請
纓只合謝終軍棲遲潦倒三間屋生計商量二畝芹感激
臨風書一紙相招賴有舊同羣

移家吳江僦居沈子鬻聽蛙溪舍

誰云天地寬觸足卽有礙一載六七遷高枕得安寐撥棹
來吳江浮蹤暫相寄杞憂雖莫釋塵纓此聊洗穠穠桃李
花春光正明媚見人多豐頤我顏覺憔悴去年當此日江

頭亟烽燧獻策伏軍門思欲効指臂二楊履泰與一陳明

同仇賦敵愾所持但褻勸義色動旌旆助陣爲聲援鄉里

自保衛秣陵瓜步間聲氣實相賴鍾淮張纘各罹禍我身

幸猶在舟楫不我操巨川豈能濟不若師明哲保身以有

待憤恨雖填膺緘默久忍耐時事不可言浩然發長喟溪

頭新水活邨舍雨初霽蛙聲正滿耳吾且聽鼓吹

懷董竹初北昌表弟餘杭

天末遠山青長汀接短汀懷人易惆悵休上客兒亭亭在餘杭

篋中檢得曉楓貽書慨然成此

遲我來三日誰知一面難此生幾相見來書中引詩語斯語痛無

端有約空招隱臨風尙勸餐篋中書一紙淒絕忍重看

嶺上白雲集

卷二

九

挹秀閣望上方七子諸山

偶來勝地一盤桓無限離愁怯倚闌卻笑有家歸不得好

山借與別人看

夕陽有鳥倦飛還指點羣峯斷續間一語強顏猶可說客

中仍得看家山

李家酒樓題壁

隔溪閒訪酒中仙斗酒能成詩百篇除卻鑑湖狂賀老更

何人識李青蓮

滌器休嫌憤鼻輕當壚亦復寄閒情如君夫婦耽高隱不

數風流馬長卿

沈藹士丈還讀圖爲子鸞題

士爲四民首農卽居其次學不諱治生橫經重負未西周
髦士蒸不在教稼外東京有明詔力田繼孝弟經訓乃蓄
畚古者本無異學古得入官每自田間至後世風尙殊耕
讀判爲二閉戶苟潛修往往缺簞食吁嗟衣食足而後知
禮義良由恆產無所以致斯弊先生起太息繪圖寄深意
令子幸相逢高蹤得追企禮耕義爲種學不昧所自幽風
無逸篇人各有本計時平倘得歸願伍農民細餘力以學
文古訓守弗替

甘泉橋

楊柳千條更萬條綠波三折客停橈龍泉一勺清如許搖
過吳江第幾橋

嶺上白雲集

卷二

十

舟夜寄內

煙波綠徧柳條條別後心情寄畫橈憶煞櫻桃湖上路扁
舟微雨畫眉橋

午日紀吳江盜警

避兵方苦無靈符伏戎又見興萑苻蠕蠕蠢動是何物推
原禍始滋難圖河運不作海運始連城千百停舳艫毀柁
折桅棄如屣有如華屋成邱墟黃頭兒郎好身手一朝失
業將何如初猶躡蹤聚宿莽漸更掉臂游通衢公然持刀
入城市閭閻日夕無安居平時且不異豺虎焉得今日非
獠貙君不見有明之弊裁驛夫羣然不逞皆此徒

贈沈子鸞卽誌別時將移家陳溪

茫茫四野多風塵，牛車何處容安身。金閭雖好住不得，一
帆且挂吳江濱。吳江近我故鄉里，平昔經過棹常艤。雖然
不比晉桃源，得遠烽煙差可喜。況更相逢沈亞之，未曾識
面已心知。感君借我數椽屋，安居容我全家攜。嗚呼人情
薄，已久經歷世。故秋雲厚平生落落寡，所交高義如君豈
恆有我來作客。眞如歸論文，且暫塵顏開阮家。咸籍都風
雅，謝氏封胡亦尙才。多情欲挽萍蹤住，無那飢來驅我去。
識君方恨十年遲，更惜臨歧別匆遽。人生會合良有緣，相
逢思難豈偶然。此感匪獨在意氣刻之心，骨銘脾肝從此
相思隔雲樹。知君定有懷人句，扁舟他日得重來。認取今
朝送行處。

嶺上白雲集

卷二

七

別沈香白

炳章

沈郎苦意留人住，陸子乘舟欲去時。今夜再燒三寸燭，片
帆特地爲君遲。

逢君釣雪灘前路，送我垂虹橋上亭。他日青青堤畔柳，重
來繫纜說曾經。

陳湖

舊本一大邨，落後沈爲湖。相傳湖水清淺時，猶見水底
街井馬石。

行盡吳江路，陳湖浪拍天。祇今成水國，何處問桑田。索靖
正傷亂，方平曾遇仙。當時吳祭酒，留得好林泉。

陳墓

在五保湖中爲宋孝宗妃陳氏墓旁有蓮池院當時命僧守祀今寺尙存

五保湖頭淨碧沙玉鉤斜畔月鉤斜路人指點埋香處開徧一池紅蕩花

金屋藏嬌姓氏同長門一例怨春風鈿釵當日新承寵應有才名比漢宮

一樣妝成異笑頰李妃亦是後宮身卻憐荒冢無人枉費金錢幾萬緡

寂寂芳魂弔古邱好花開傍錦溪頭史家不立陳妃傳留得南都土一坯

汪研卿

俊

出示今未是齋詩賦贈卽效其體

嶺上白雲集

卷二

三

黃河之瀾一折一千里太行之雲鬱鬱從空起有淳與峙乃成宇宙之奇觀不意君詩奧衍曲折亦如此攜歸亟讀雙目瞠奇闢不顧見者驚往往盤空作硬語紙上趨躍如有聲鐘鏞本不作凡響一震三日耳尙鳴就中意議足傾倒一一從未經人道細讀皆我所欲言又疑是我腹中藁何時遁入壺中天探而出之君乃先天公斬我一枝筆意所欲語筆不宣乃知妙義在天壤自君得之進益上正似麻姑好指爪搔着蔡經背上癢我今方居患難中知君在此亦厲公兩人之詩光氣皆熊熊何怪與世不同其窮君不見蘇季子羸滕履躋人不齒又不見朱翁子艾薪束擔餓欲死人生識字憂患始才人失路分應爾吁嗟乎寓

形宇內一曠耳莫任昨非今未是

蓮池寺望五保湖

一望浩無際四圍不見山船來天盡處村在水中間波闊
魚知樂雲深鳥自閒浮家容小住足可破塵顏

陸輪香

雲桂

丈囑題尊甫松濤先生坐花醉月圖

春光到眼自融融回首芳園樂事同花氣平鋪裯席上月
波橫落酒杯中一時雅集都名士四海題詩半鉅公莫道
浮生真若夢至今人尚話高風

懷人絕句十首

空勞攬轡志澄清騰屨歸來亂未平曾與知兵楊萬里商

量事業話宵檠

楊子安

子城

嶺上白雲集

卷二

三

躑躅牛坊馬磨邊占星煩爾夜觀天可堪紀事詩重讀冷

眼梅花又一年

李昱德

江鄉同作賃春人米盡囊空孰饋貧聞道今年苟奉倩茫

茫獨立更傷神

陸又狗

何須不作棄縞生壯志銷磨眼尙明江上何人謀破敵潤

州早說是空城

劉伯純

皖江淞水歎奔馳此日依人事可知直欲風詩刪陟配知

君血淚綆千絲

劉雲卿

傳烽一夕徧江潯問道何從問信音我比飄蓬更無定滿

天風雨誤君尋

曹少雲 燕卿 昆仲

字是明皆姓是陳不忘溝壑卻忘身時平安用民稱義願

爾乃爲耕鑿人義民陳明皆

臨河高壘築奔牛便欲投鞭斷眾流訓練自然成一旅斯

才應不愧程休鄉兵趙玉芳

理憂漆室意何深破恨惟憑濁酒斟識得人間忠義字知

君盲目不盲心蔣村瞽者

數椽茅屋橘初香竹外風來一院涼今日江南望江北不

知何處鄭公鄉太平洲鄭老

早秋

一雁下汀洲飛飛去向留思歸常倚棹望遠獨登樓海上

賊猶在江頭兵未休庭風吹落葉又作去年秋

湯雨生都督輓詩即用絕命辭原韻

嶺山白雲集

卷二

古

諸將還軍日孤臣效命秋晉惟知退舍秦不用吾謀斯世

無宗澤何人識薛收梁山輕失險痛恨欲誰尤

父祖傳忠孝

乾隆丙午死林爽文之亂

天人敢怨尤家聲今克繼忠骨

問誰收不負沈舟志何須擊楫謀波濤看怒湧此水亦千

秋

嶺上白雲集卷三

元和陸懋修九芝著

男潤庠鳳石校

金澤贈胡海霞

其炳

茂才

人生所貴能讀書豈獨博覽供鈔胥胸有古人千百輩出
語自與今人殊胡君海霞人中傑掩關白苧村中居今年
遇我錦溪側各道所蘊胸懷舒平生所學是何事肯負七
尺昂藏軀世無知我道自貴退而教授鄉之隅一齋治經
一治事君家故業原殊途動作往往異時尙何怪舉世稱
其迂我生求友逾十載相逢儕俗皆非夫得君意氣自相
合乃知吾道原非孤所願塵襟急除滌與君匿迹偕樵漁
遽廬風雨自經濟相期抱道爲眞儒自古力學賴少壯毋
嶺上白雲集

卷三

一

令歲月嗟奔駒

余將移家金澤研卿誤以爲歸蘇州也有詩贈行卽

次原韻倚裝酬之

心事悲柳肘行蹤歎瓠落天地雖云寬何處可插腳聚久
忽言別君聞得無愕烽煙尙危城豈有還家樂殘聲曳鳴
蟬聊借別枝託吾道日以衰世情日以薄與君一相遇懽
然比李郭同舟苦難濟奈此風波惡如君騏驥才鹽車豈
終縳哀我蘆中人立錐幾無着臨別感贈言豈但爲離索

邨居雜感

大川欲濟笑藍舟克敵何人築武邱營裏樓臺都入畫軍
中粉黛不知愁一時技擊皆貂尾終古英雄屬虎頭信煞

長江波浪闊不知冷眼有沙鷗

回首江頭戰血殷愁雲漠漠雨潏潏寇來自落千尋鐵險
失疑平兩岸山鑄佛太多金已盡補天有術石皆頑直須
請劍舒孤憤誰叩剛風上帝關

阡陌平除作戰場連邨無寇孰披猖投繯婦女成家瑞寶
巷嬰兒亦國殤豈有收京借回紇更誰助餉到睢陽諸君
學得無情法看盡流離不斷腸

全師河上自逍遙在路弓旌肯見招自是軍容皆霸棘豈
真敵勢似苻姚烽煙蒿目經三歲花柳何心問六朝知否
五湖最深處怒騰還有子胥潮

寄婦姪程小倬

廷梁 驚湖

嶺上白雲集

卷三

二

道光己亥歲我始登君庭我年二十二君時方六齡花柳
媚晴晝好鳥當春鳴未值亂離日不覺時承平曠息十餘
載義馭無留停君亦如我年我已四九羸惜君早孤露家
室悲伶仃數來不一見動若尹與邢深談快今夕使我心
獨傾慷慨論時務知君非無能胡乃抱此才鄉里名不稱
悲君還自悲患難遭頻仍壬寅年之夏寇逼京江城脫命
破巢下事過心猶驚越歲在癸丑烽火江頭明紅巾忽滿
路又弄潢池兵奮袂志殺賊豈必有宦情一投班生筆再
請終生纓盾鼻墨空吮寶劍腰徒橫歸來黑貂敝雙腳悲
羸滕逢人不敢訴守此三緘銘孤雲獨曖曖何必餘暉爭
與君論往復得失惟君衡回首少時事白雲多變更作詩

遠相寄中有慨歎聲

除夕

一臥滄江逼歲殘
支燈寂寂坐更闌
春前花鳥愁先到
亂後情懷寫亦難
牀席未安休甲帳
琴樽久撤況辛盤
追思事事成惆悵
併入今宵感百端
安得風塵一掃捷書屢報事仍虛亦知刻鵠終如鷺肯道成龍卽是魚釜底抽薪空獻策盾頭磨墨枉飛書獨留一劍銷孤憤擊柱狂歌恨有餘

暫此容身隱一壺
驚心又見換桃符
避災至竟同桓景
餽歲何因學老蘇
賈我癡猷吟更苦
傍人門戶計原麤
青春已到蘇臺路
作伴還鄉事有無

嶺上白雲集

卷三

三

閒門冷落笑莊荒
愁裏新年度欲忘
隨例祭詩無酒脯
別居聽鏡有糟糠
待看紫氣回瀛海
終望妖氛息斗芒
稍喜出門聞吉語
春歸先與祝平康

南湖霽泛圖爲陸曦叔

日愛

司馬題

紅樓隔水夕陽明
一葉扁舟畫裏行
始信溪山最佳處
宜煙宜雨亦宜晴

得海霞錦溪書有詩見懷四疊原韻奉酬

綠波何迢迢
碧草何離離
良友一爲別
別會合知何期
吾道日以衰
世途日以歧
前賢不可作
往哲徒追思
嗟我少問學
溝猶良堪悲
因君欲自淑
遽別失所資
獨行過君門
往往立經時
室邇人則遠
歸來復何詞
執訊感相招
買舟少

餘貲非乏買舟貲水國無篙師安得風雨來長吟雞鳴詩
朝發金溪棹暮向錦水維我雖不能飲爲君盡一卮相約
本非遠相見猶嫌遲

生逢承平世不識有亂離耕鑿各安業便自成昌期豈知
蕩平路忽若歧中歧艱苦歷九遷往事堪回思撫今固鬱
歡念昔尤足悲黃金散已盡生才何所資意非不自寬憂
來無定時淵明謝五斗飢驅拙言詞杜陵破茅屋誰寄草
堂貲祇應閉門臥袁安爲我師太息復太息因君作此詩
日月不可留長繩難繫維羞將顛顛容還來照酒卮放船
至中流補漏亦已遲

尋常過從人欲別猶傷離抱琴沉伯牙所遇惟鍾期當其
嶺上白雲集

卷三

四

論學問亦若意各歧異途實同歸妙義惟君思思君殊常
情不爲離別悲渺焉獨寡處藥石將誰資自我遇世變出
語每傷時前車鑒不遠知君有微詞譬如彼良賈居積千
金貲垂堂尙知戒此語良堪師風騷善寄託比興皆成詩
君意豈不然三復常思維飲醇自心醉何必傾金卮鄙吝
苟不萌卽今猶未遲

結交惟結心不在合與離形迹雖暫隔意氣終相期墨子
惡絲染楊朱泣路歧聖狂判一念此意良可思賤子抱微
嚮扞格時自悲逢君默心契絃韋深相資古人渺千載何
幸生同時說經得大意論史聞偉詞慷慨忤時俗市義輕
多貲世人皆迂君我卽迂是師人惟有性情始可與言詩

此意近皆昧孰與爲綱維舍此縱多能終爲無當厄姤修
願交勉無恨相見遲

蓮池寺訪杜迂谷

儀鴻

次壁間韻

等閒投贈總奇才忽見君詩眼一開白雪幾人歌下里黃
金何處築高臺唳天孤鶴雲中墮拍岸羣鷗水上來惆悵
芰荷花欲盡闌風長雨更相催

舟過吳江簡沈氏昆仲

殷勤曾爲唱驪歌復此江頭一棹過船到門前因路熟人
於別後覺情多空山雲盡難爲雨斷港風來亦有波亂日
相逢無好語釣竿欲拂意如何

丹徒晤劉伯純歸後有詩見貽次韻寄答

嶺上白雲集

卷三

五

胸積千萬語何容坐默默緘口乃不言此意問誰識必遇
素心人猶若動顏色戢影兩載餘重過朱方邑故人喜我
來云已久相憶穢棹雖恩恩還能道胸臆所苦負擔弛仍
自肩難息歸舟發江頭蟲聲正啾唧思君無窮期豈但傷
離別往復寄懷篇憂眉舒未得

宣公墓古柏重青圖爲曦叔作

蘋蘩何處薦忠魂古木森森指墓門樹色蔥蘢常不改家
聲清白與同論獨留正氣回天地尚有餘陰覆子孫此意
寫從圖畫裏爲傳祖德告諸昆

袁青士

萬升
見訪

北風吹幔起斜月欲西沈爲與故人話不知寒夜深違時

身可隱憂道病微侵他日芳園裏還來秉燭尋

陸輪香曦叔朱臨川各餽米詩以志感

於菟家毀難莫紓馬援軍前米空聚歸來慟哭胥江濱忽
落萍蓬澱湖許流離已是經三年那怪竄空詔隣鼠豈眞
文字能撐腸經籍徒充不堪煮丈夫失意亦偶然吾道艱
難竟如許平生不作仰面人肯逐屠沽訴腸腑飢來驅我
強出門口未能言意先沮逢君忼懷逾恆尋莫道今人不
如古笑余敢比顏清臣君輩皆爲謝仁祖不堪回首前年
春浙米矛頭氣方鼓眼看侏儒盡一飽臣朔徒飢欲誰語
詩成擲筆一慨然手曳龍泉起還舞

將歸蘇州留題浦氏草堂

嶺上白雲集

卷三

六

破曉抽帆將欲行倚裝還與坐深更小山桂樹留人意淺
水桃花送我情聚久益知離別重地偏自覺往來輕他時
笠屐如重到草木還應識姓名

走簡答海霞

正倚西風感百端多君一爲勸加餐報書但寫平安字抵
得連篇累牘看

爲潤兒向鄰翁乞書

書生有結習自覺氣常腐見人几止書目側手先撫藏書
憶我家蓄積自先祖自我隨父任攜之京江許一遭夷馬
矢再傷楚人炬殘編雖或存十已失其五頻年屢遷徙久
寘於他所今來取以歸曝之向日午抱殘而守缺此意亦

良苦兒子年十五賦質本愚魯授以十三經猶能解訓詁
旁及十七史強聒未入肚身居患難中讀書亦何補非敢
望兒賢聊以慰吾父前者入公室清談聽揮塵一卷古人
文閒編歎觀止借讀亟就公藉以啟矇瞽但如荊州城終
是孫家土久假雖不歸勢豈得安堵異想忽天開有例得
援古古有乞花詩文公興方鼓亦有乞米帖魯公箸乃舉
我心竊效之法古不嫌侮公亦嗜古人知公不我拒惟公
念小子有力尙知努教養本無歧缺書等缺乳少者誰能
懷仁心自公普含意屢欲伸侷促吐還茹公聞笑不休竊
窺似心許

家居

額上白雲集

卷三

七

三間屋小是吾廬好時田無半畝餘筆架琉璃成底用馬
馳款段恐終虛歸裝并少鬱林石行篋惟存笠澤書願守
醴泉交讓木胥屏亭畔賦閒居

念小向帥退師丹陽常蘇聞警遷徒袁青士遣舟相迂攜
家就之居三月將移魏塘賦此誌感

金陵賊勢肆獞猖大軍移駐趨丹陽退守進戰兵威揚森

嚴紀律非張皇奈何消息不得詳訛言恟恍來無常我歸

方及半載強嗟哉趙壹羞空囊豈惟欲渡河無梁河水乾

涸先官塘

時已久旱水涸

欲行不行生徬徨出門一步皆非鄉故

人尺書頻我商胡弗就近移輕裝感君遂空所坐堂約我

全家載一航黃口白髮相扶將煮飯爲碾香稻杭更令兒

友羅酒漿一住三月不覺長身安直欲患難忘此鄉真不
殊柴桑卜居惟有南邨良好春他日同綠楊子孫願得生
隔牆

結交行

面朋密不甘心交淡於水盟心苟不渝何必天日指我生
嗜友朋直以性命視相識非不多相得乃無幾非敢臧否
人人自有臧否人面各不同人心亦如此我思倫有五朋
友一於是一若與之交終身不可改苟欲善其終必先慎
厥始嚶嚶鳥鳴聲出自幽谷裏行行徧他山喬木變棘枳
取友以性情交道庶無倍知己且勿求務在先知彼

望雨

嶺上白雲集

卷三

八

雷車乍聽轉豐隆火繖高張又碧穹潭底癡龍呼不起日
中野馬自行空田禾槁臥墳同自驛燧紛傳夜尙紅兵氣
未銷荒不得杜陵憂國願年豐

魏塘贈李簡齋

斐然

茂才

與君晨夕共清游高雅如登太白樓地僻獨開詩世界時
平但識酒春秋君善詩詞時方成酒春秋一書不因舊雨無今雨早信清
流異濁流余因海霞得識君最好江邨鄰白苧朝朝不斷往來舟

地距金澤僅十餘里

論詩有贈

世衰道久微不絕僅如綫未能轉風氣肯爲風氣轉降而
論詩旨末俗亦夷串譬如繪畫事先素後乃絢守旣愧白

絲詞徒妙黃絹世無張司業誰如肉貫弗幸哉道義親得
逢金閨彥或者管可窺肯令壁徒面步趨居後塵逸足迅
追電所嗟患難中蹙蹙少安便蹤迹但逐流淵源隔河汴
淑身旣末由摘辭豈能善往復論夜深燭跋坐忘倦結網
宜平時豈待臨淵羨明朝載酒從追陪更杯讌

月公禪房

一徑通幽別有天欲從貝葉問真詮能仁法說雙龍樹無
種花開七寶蓮好傍遠公重結社且隨蘇晉學逃禪塵顏
未許從今洗得食茶瓜也夙緣

勞人草草少安居並世賢豪百不如論史兼袖方技傳球
時先讀活人書雕蟲篆刻心知誤攬轡澄清願亦虛何處
嶺上白雲集

卷三

九

更容違俗客不堪蓬矢說生初

贈龐心舟

清惠

與君邂逅得相親疎略中能見性真爲檢襄陽耆舊傳自
誇先識姓龐人

過陸靜安丈書齋

襍袂來游幸識公遠徵家世說江東得窺老輩鬚眉古喜
與羣賢姓氏同甫里尙餘高隱地忠州別有活人功明年
許借東頭屋願問持瓢荷鍤風

公善醫術有同居之訂

再贈月上人

鬢絲禪榻颺茶煙橐筆江頭感去年壯志徒勞戈作枕生
涯依舊研爲田哦詩賈島先呈佛采藥劉綱且學仙閒讀

道書消永晝倦來只向上方眠

題金小酣

其相

大令變徵餘音後爲其女弟靜因夫

人作

夫人名慧爲嘉善蔡佛華繼室蔡宰湖北廣濟縣有聲
寇至捧檄軍前戰功屢著尋爲賊害時夫人方在武昌
圍城中聞報慟哭欲殉夫死而以夫骨未卜爲恨及城
陷一子又以罵賊亡夫人匍匐道路尋夫骸骨不得哀
籲 賜卹忠魂以慰會兄小酣遣人迎之歸歸後誓養
姑事畢終以身殉語見哭夫詩中

女子重德不重才古訓自足閨門垂遭逢離亂苟無具徒
經溝壑將安爲金家有女蔡家婦隨夫遠宦潯陽走痛矣

嶺上白雲集

卷三

十

循名方共傳倉卒兵戎起襟肘誓死殺賊趨漢陽兵單力
竭身重傷聞信那弗亟求殉夫骨未卜歸何方忍死撫孤
痛日夕豈意武昌更圍急城破兒先罵賊亡側身何計逃
凶逆輾轉弱息竟得全忠魂得卹祚得延姑在還當代子
職自吟短句貽重泉嗚呼無才孰能此爾足歸來一女子
寂寞秦樓引鳳聲最憐仙侶如簫史阿兄正鼓雍門琴那
得宮音不變徵

讀醫書

青衫脫卻換青囊一卷靈蘭讀未忘徧檢竟無醫俗法窮
搜獨少療貧方平生不解彈馮鈇何處還容坐管牀畢竟
養生有真訣漫將煨竈笑嵇康

曹愷堂大令以西湖紀游詩見示有感而作

正聽江頭急斗刁湖山佳處獨逍遙板輿願得酬潘令金

屋妝還靚阿嬌愷堂攜侍姬奉母夫人往游隔歲畫圖能不負一時風

月若爲招卷中應有黃墟感燕子磯頭咽暮潮詩爲癸丑三月作湯

兩生都督先於壬子秋爲之繪圖愷堂之游正在都督殉難後傷已

次韻酬金小酣見贈之作

聽講依然未悟空愧無好句得紗籠愁難除似春前草迹更浮於江上蓬捫蝨談原非世貴射雕技只讓人工曲終枉作吹簫客低唱何從問小紅

吳江歸棹得顏紫軒懷宸贈詩

席帽無端滯客程扁舟今始返柴荆欲拋家事眉仍結卻

嶺上白雲集

卷三

七

見君詩眼獨明惜別傷離游子感推襟送抱故人情幽懷獨寄楓林葉桃李紛紛正滿城

黃香館裏識君時得接平原已悔遲況更頻年常作客但

憑尺素寄相思歸來猶惜城闌隔過從還愁僕馬疲卻惜

寒山三月住烏啼月落未君知道光戊戌余曾喬寓楓橋

聞官軍收復京口寄楊子安子城

忽聞報捷解愁腸喜正狂時意轉傷計日早應期我到隨風便欲墮君旁漫云建德非吾土直視并州作故鄉莫怪收京聞杜甫一時涕淚滿衣裳

潤州凱歌

頓埽江邊萬斛塵蛇龍一夕氣皆馴請看寶蓋山前路雪

滿弓刀夜殺人

京口九日得輪香丈錦溪貽書賦答

回首珂鄉杖履親，憐才未了重憐貧。
力無可助腸偏熱，語不能傳意更真。
稍喜甕城還北府，每思錦里有南鄰。
籬邊爲漉陶公酒，卻憶先生烏角巾。

重游焦山

焦山鏡秋上人善譚能詩，近今島巨也。癸丑之亂，沿江
名山古剎無不遭紅羊一炬。上人以廣長舌說無上法，
使頑石點頭得靈光，獨保王師收復鎮江之明年。趨庭
郡校鼓柝重來風景已非，河山如故，偕同人作竟日游，
仍用東坡自金山放船至焦山韻。

嶺上白雲集

卷三

三

遨嬉將帥樂，且耽烽煙不斷來。
江南嗟哉北固與浮玉，焦山實與奇成三。
平昔扶笻屢登陟，忽比棧道艱叢蠶。
張家兵馬肯殺賊，斬王戰烈真無慙。
今我中流徑鼓楫，尙有蛟鰐窺深潭。
河山不異風景別，一回憑眺情逾酣。
詩僧鏡秋久主席伊蒲，作饌供清談。
爲道降魔伏怪時，憑仗佛力搖銅龕。
禪房花木幸無恙，清泉一勺今其甘。
亂後重來話風月光陰，過客能無貪金陵。
鍾阜近相接，題詩峭壁吾猶堪。安得亂定徧游歷，高蹤還問焦先菴。

將訪袁青士於赭墩先得四十字

與君同縣住相隔，但城頭一見動。
三月重來已九秋，道衰無可語。
計拙欲何求，出處勞商榷。
歌聲起暮愁。

湘城湖迷路不得抵袁改道就陳溪作

船過鯀溪復有溪煙波渺渺夕陽低仙家未許人輕到行
近桃源路更迷

滿意今宵秉燭尋更闌好與細論心豈知相望無多路依
舊篷牕坐夜深

不眠特地數更籌坐耐西風半夜秋頗似剡溪波一曲子
猷乘興又歸舟

已是風塵久慣身卻教沮溺笑迷津明朝預恐陳溪老又
作新豐呂逸人

燈船詞

花天月地足招邀鬢影衫痕蕩畫橈一箇小船燈百盞教

嶺上白雲集

卷三

三

人錯認是元宵

暗將心事托微波斟酌橋邊不斷歌行過山塘三里半柳
陰低處畫船多

游山已了近黃昏檀板金樽酒半温月上一更歌一曲隔
船人影也銷魂

花叢到處是歡場浪學蜂顛趁蝶狂一路畫船簫鼓裏不
知何處有兵荒

嶺上白雲集卷四

元和陸懋修九芝著

男潤庠鳳石校

出門

豈不戀蓬華，飢來驅我行。顛倒作奇想，乃問之江程。上堂別父母，一再重丁甯。道兒體素辱，未慣風塵經。長年不離侍，四十猶孩嬰。兒去望兒歸，毋徒役利名。下堂別妻子，妻子淚欲盈。丈夫志四方，勿作兒女情。堂上有白髮，膝下無次丁。喜懼不可說，君心當自明。止止勿復道，使我心暗驚。送行客在途，嘶馬催離亭。勉強出門去，十步足一停。回頭望庭樹，杜宇方聲聲。

舟行過程氏莊有感

嶺上白雲集

卷四

一

櫻桃湖上煙波足，一枝柔艣搖新綠。芳草門庭是謝家，停橈慣問湖之曲。烏兔狂飛二十年，不堪甥館說從前。死亡相繼識何故，一家骨肉多重泉。茫茫天道信與否，和氣春風憶老舅。善人得報乃如斯，斯理何從語吾婦。遺孤藐藐猶弱齡，覆巢一卵悲伶仃。所冀他日得成立，能以繼起綿家聲。此來直似西州路，細雨斜風愁問渡。風景依稀不忍看，邨前徑自抽帆去。

柯巖道中

江波曲曲送行舟，好景多從眼底收。一路看山青不斷，畫眉聲裏過嚴州。

嚴子陵釣臺下作

數家零落不成邨，繫纜重將古事論。賴有先生臺一角，漢家寸土至今存。

高風千載仰靈祠，尙有遺聞繫我思。一樣徵書當日被，如何周黨少人知。

路鳥船

我聞之江以上水石齒鑿鑿清見底，屈曲舟從石罅行。索挽繩牽日幾里，今來五月涼如秋。一雨十日不肯止，兩崖束筍逼水流。高下奔騰疾於駛，峯迴路轉湍亦旋。一灘乍過一灘始，篙師偏欲與水爭。嚙浪吞波誓相抵，持竿挂腹腹拄竿。伏地喙鳴欲投體，投體不足繼。以首落水船頭起，船尾須臾上灘水。略平邪許聲聲尙無已，同人變色始少嶺上白雲集。

卷四

二

和其道灘聲過船矣，可憐黃頭真健兒。性命直等鴻毛視，我輩徒爲食粟身。對此能無汗如泚。

米灘行

袁青士本約同游，不果作此寄之。

我生少游，歷平居祇掩關。往來無過數百里，出門未識行路難。今年忽作皖游想，之江水漲方瀾漫。同行有客老此途，歷數諸險名驚傳。有名之灘七十二，就中最險稱米灘。將行十日近此地，灘猶未到膽已寒。篙師勸我上岸走，雖非健步良安便。緣溪上山山漸高，臨崖俯瞰驚奔湍。那許聲聲聽逾勁，下流船正來蟬聯。推船嚙浪浪嚙船，船頭與浪相播顛。上灘及半勢不敵，可奈岸曲繩猶牽。抽刀割緯

縉齊斷呼號求救方喧闐須臾船已失所在但見白浪還
滔天自顧此身幸登岸不然性命輕黃泉主僕相視盡失
色猶慮諸客生同捐行人告余可毋恐船已逐浪迴前川
但能振柁挽船住便得傍岸仍安全喜聞此語色方定良
久諸客皆來前破涕一笑互相慰倘非上蒼能見憐此時
漂泊識何所那得今夕仍安眠歸舟坐定更思險驚魂猶
若臨深淵自此歸家戒輕出閉門願得如袁安

新安呈張小浦師通政四首錄二

萬家生佛頌聲同一路卿雲覆被中春衍旌旂皆瑞靄威
森鼓角亦仁風澄清自矢平生志保障羣欽不世功寰海
人人殷望歲得私恩澤獨江東

嶺上白雲集

卷四

三

異數欣傳拜 玉墀九天雨露有殊施不因四海推公望
自倚孤忠結 主知筦鑰南天權此日經綸北闕定他時
功成待奏鹽梅績威鳳原爲阿閣姿

懷孫穀堂

式榮茂才黟縣

去年我客京江城君正思歸歸未得今年我作新安游君
得歸家我行役勞人草草居不恆逆旅逢人半新識我心
所念惟孫登卻恨雲山隔咫尺馳書問訊應不難又苦寥
天少鴻翼方知地苟名桃源影距郡百里地有小桃源便與凡夫遠相
隔到眼分明水一方欲往從之渺難卽風雨宵深作此詩
無數離愁盪胸臆不如去歲驚狼烽危城猶得同晨夕

陳小魯

本中

爲作私印賦此奉酬

小魯嗜古有奇癖漢碣秦碑徧搜剔精心金石窮皇墳篆
隸源流恣考覈餘事兼工作印章龜紐陀頭擅雕刻雙腕
運動勢若飛奔赴雨風走霹靂剗齧疑有神鬼工鐫鏤詎
露斧斤迹誰云小技同雕蟲此事千秋其矜惜如君奧博
心所儀鉅手煌煌播夙昔卽今橐筆來從軍已見千人盡
凌鏢我聞退之昔有言爲文先宜字略識石渠虎觀今誰
追斯邈遺編少尋繹賴此通知今古文淮別能分自多益
安得坐君石鼓旁謬誤從君正六籍

行李已戒途矣孫穀堂適以試事來郡不數言卽別
思君君不到君至我偏行一面幾相失兩心無限情道衰
愁作別身賤敢談兵各有高堂在毋爲徒近名

嶺上白雲集

卷四

四

桐巖道中水肥風飽舟行如飛意有所慨發之於詩
朝發滄安江暮至富陽縣計程三百里風帆疾於電蓬窗
兩岸山左右恣流眄巖巖方前迎忽已在後面懸崖偶壁
立轉眼失蔥蒨心憶子陵臺未來已先盼豈知過巖瀨路
已百里半人生當前境事後方知戀好景況不常一去類
傳箭又思順逆理循環更難判前游十日程茲來一朝徧
遲速何相懸天公好爲幻退易進則難於此亦可見況更
異安危水懦若可玩因悟境易心眼前得安宴便忘昔所
難忻戚亦隨變艱苦況他人誰能卹憂患何怪富貴場不
知貧與賤獨坐念人情喟然發長歎世味今略嘗此行已

寄董竹初

西湖小住已經時莫怪音書寄更遲萬緒填胸無可說只憑寸管寫相思

險絕之江去復來烏篷新自浙西回此行恐被羊裘笑滿曳風帆過釣臺

追思祖德亦綿長二百年前是故鄉不道兒孫更十世重

來此地逐名場

時方借浙闈舉
行江南鄉試

涸鮒何堪困莫蘇柴桑三徑幾全蕪爲君細道年來事抵得連宵翦燭無

得胡海霞書旣作報章賸之以此

百年三萬六千日一生經得幾離別尋常不見猶相思況

嶺上白雲集

卷四

五

此遠行隔吳越此行本非君所許幾度書來戒輕出奈何

家食難自安豈曰紛華忽心悅出門一歌行路難客子心

悽欲誰說嚴灘歷歷驚洪濤入險出險幸得脫南陵賊勢

久蔓延密邇祁黦肆出沒新安戍壘方傳烽叱馭心驚坂

三折綠陰深處子規啼東望白雲是親室良友分明天各

方千里誰云共一月拂袖竟歸興轉豪素衣幸未縑塵涅

三日卽達臨安城尙恨吳淞煙水闊喜得鄉書入手看感

君爲我謀三窟就中又作勸駕詞反覆知君益心切我原

早信君非迂君亦能知我非拙或出或處共此心此感能

無鏤心骨一紙書成四十行還將近事爲君述月在辛未

日紀申此書歸自新安發

廣寒詞在杭州作

金粟飄殘幾度黃
銖衣猶帶舊時香
如何七寶裝嚴地
一任天魔舞道場

玉宇瓊樓彩久韜
好秋空仰月輪高
可憐玉杵無顏色
擣藥年年總枉勞

等閒許借廣寒宮
擣笛牆頭調孰工
爲問月中八萬戶
可能吹滿桂花風

冰輪乍湧便梯雲
仙袂飄飄盡不羣
到此去天剛尺五
看人先草上梁文

天街綵仗簇朱旗
王母雲輶駐未移
忙煞南宮諸老宿
朝眞先要向西池

嶺上白雲集

卷四

六

步虛聲裏認飛瓊
回首龍華夢尙縈
兩度壺中忘歲月
今年桂樹又冬榮

絡角星河夜向闌
月波如水浸闌干
祇愁失卻霓裳譜
絕少靈霄秘笈看

多少星辰往復回
知他誰是謫仙才
底須碧海青天夜
始悔當年竊藥來

高家養

涓川高氏名熊舉
金陵人幼讀書長而服賈以節義自許
癸丑之難募鄉勇爲守禦計事甫集而賊已蔽江下
君移巨甕於庭置水令滿自投甕中其從死者則君之子
德豐德升冢婦謝及女孫三杏姐姐轉姐皆德豐

出也季子德泰字子安以鄰人救免作蜜芳錄表彰節義其戚姚必成爲之傳

人生讀書貴有用但以文名何足重生逢患難肯惜身甘但葳蕤守家弄拔劍一爲斫地歌齒裂背張有深痛事勢一去可奈何仰視蒼蒼欲誰控一朝視死眞如歸慷慨全家誓相從嗚呼節義今誰知舉世昏昏盡如夢立懦廉頑在此人千秋請視高家甕

與葉遠菴

紹祖

通守夜話

羈愁無限上眉端幸得新知結古懽相賞豈徒文字末所求獨有性情難親猶未老名先就官到能清夢亦安歎息鴛原同抱恨舊時書劍忍重看

嶺上白雲集

卷四

七

孫穀堂以親喪來訃作此唁之

逢君新安城把臂不盈刻行李已戒途未遑道胸臆但問堂上安聊可慰相憶別君來武林停蹤未煖席修成尺素書正擬託鴻翼君書入手看喜氣動顏色擘函愕然驚事非意所測字字血淚痕滿紙尙標擗君昔侍老親避亂荆溪側親力幸未衰君歸省門闕近得平安書慰以好眠食天乎胡不仁一朝降奇厄傷哉樹欲靜可奈風難息君本純孝人此痛欲何極願守不毀義靈輒返朝夕馳書遠唁君雨風正浙浙

送鄭旭初

鴻飛

歸閩

人生等作逆旅客有似萍蓬偶相值風來水面一聚之轉

眼無從間蹤迹獨君遇我餘杭城童僕心疑舊相識豈真
車笠有盟言杵臼交新自莫逆聞道離家十四年垂老雙
親已頭白寸草春暉寄意多君心自是思歸亟代馬今隨
越鳥南白雲雖近程猶隔我亦天涯游子身那弗因君感
惻惻所惜淨蹤居不常燈鏡言歡但晨夕送君歸去我亦
歸行矣修途各努力

里門題顧子和

濟乾浙游草後

同住西湖兩不知逢君已悔半年遲得澆塊磊無過酒欲
埽羈愁只有詩好句愧無貂尾續狂名合讓虎頭癡卽今
客路帆重挂記取吳江二月時

汾湖道中有懷遠菴通守并寄袁胡二子

嶺上白雲集

卷四

八

出門已七月行程未百里袁胡我故人款留且無已我心
雖急煎欲行還復止今日別君行前途去地邇道經舟子
家向我乞歸視念此本至情徇之胡弗爾繫纜方門前狂
颺忽河埃如聞拔木聲沙飛目且眯倘此急催行時正汾
湖裏那免洪濤驚誰作中流砥因知近人情庶幾合天理
今茲得晏然容或因乎此所恨路尙修到日沙難指望眼
將欲窅奈彼石林子停橈又竟日悶坐孤篷底舟子知我
心邨醪酌滿兕酒醒不成眠呼燈半夜起吁嗟爾還家我
行正今始

車公捉船行

朝聞官調兵夜聞官調兵官差捉船紛出城來船逐客上

岸行去船雜選皆倒撐耳邊但聽喧呶聲我時舟正塘棲
過舟人向我雙目暄狹河淺港且逃避如此那敢鋒還櫻
我語舟人爾無恐頻年所遇已慣經退旣不得但有進我
舌猶在尙可爭舟人耳雖聽奈非心所磨喃喃默語怨且
生欲前且卻進還退有如蹇足行時停孤舟獨坐念時事
不知何處狼烽騰頗聞廣德有賊警調防四安當結營四
安去此路非遠蘇杭門戶知非輕我身作客尙有家所恐
諜警來縱橫紛紛遷徙又如蟻聞此那弗心暗驚蓬窗風
雨聽浙瀝不堪回首時承平

賊窟四安官軍失利杭城戒嚴

羽書旁午又徵兵客裏愁聞鶴唳聲千里烽煙騰戍壘一
嶺上白雲集

卷四

九

時刁斗偪嚴城負芻忍託賓師位嚙指終傷人子情更有
吳興邱墓在松楸那免夢魂驚

圍城

十日圍城裏心惟悔此來豺狼驚漸偪猿鶴有同哀繞郭
先憊土連天但陣靈援師如早集尙可望生回

所嗟

京口十年客曾經兩度兵艱難歸故里辛苦得餘生豈謂
身重陷真愁命卽傾所嗟親已老今日作何情

城破陷賊

傷心無計脫重關一角城頭萬仞山故里所通惟鳥道明
朝敢說尙人聞耳中鄰舍悲歌起眼底弓刀戰血殷到此

何難求一死白頭二老望生還

復城志喜

哭聲一路正田殷頃刻城中散賊氛安得卯完巢破後駐

防賴有瑞將軍

瑞名昌

愁眉展盡笑顏開痛定追思轉自哀獨念老親猶未識兒
今已得再生來

杭州歸過金澤喜聞潤兒游庠到家賦示

昨者生還過金鎮胡伯爲言兒獲雋我聞喜色上眉梢所
喜士庶分終朝感激同人爲惋惜道我身亡子成立嗟嗟
成立當何如惟願兒曹能讀書讀書欲得名理足他日爲
人自拔俗汝祖當年命汝名何所取義汝自明謂汝生而
嶺上白雲集

卷四

十

近聖居孩提己自殊芸生汝當仰體重闡意毋荒於嬉毋
自棄卽今庠序好束身莫道儒冠真誤人

張營潰後蘇城戒嚴有日矣至是寇深勢亟余早檣

舟河干欲下不果家口在大雨中行里許

才脫虎口又虎口入口倉皇出門走狂奔不顧雨滿身耳
中消息皆難真但見肩摩踵接都向婁齊門或說元規塵
或說蚩尤霧駭浪驚濤識何故艱難尋得所雇船得船坐
定心始安須臾城河亦擁擠不識城門閉還啟吁嗟乎惟
願今朝得出城杭城已事心猶驚

常熟道中

出城雨雖小浪浪尙滿耳金澤百里程起自足下始冒雨

苦舟人行行十餘里停橈爲我言沾濡及表裏我家去不遠且歸換衣履不過一宿間遲遲正無幾察貌知無他聽言自近理無已勉應之官塘走迤邐好景過眼前近可南湖比所惜承平時行舟未一檣傍晚到船家翦蔬味殊美飯罷夜未深火向閭門起遠望心惕然歷歷若可指早起亟掛帆引領竊心喜舟過金雞湖忽復遇奸究見機卽返舟一宵又河埃起視滿天紅閭門火未已白屋無片椽金門悉遭燬太息復太息浩劫知胡底

到金澤

相去無過百里程如何三日始成行心交望眼穿何似尙道全家未出城

嶺上白雲集

卷四

十一

痛我生還無幾時家鄉蕩盡更何之鄰人一樣牆頭滿感到無言涕轉滋

四月十三日蘇城陷

文學言游里冠裳秦伯都一朝成鬼國千載失名區烽火連天急河山舉目殊可堪懷祖德重與賦吳趨

白蕩灣

復壁趙岐感曲江杜甫悲權詞欺老父忍淚看嬌兒去住仍難定安危未可知微聞東海上近已有玉師

卽目

眾禽欣有託相語聲啞啞願留殘樹木尙有失羣鴉

擬杜諸將

漢疆唐索鞏河山神武當年早入關一代聲靈仍絕域百年恩澤況人間無端烽火連雲赤又見弓刀漬血殷願得守邊有頗牧早圖凱覲慰 龍顏

崔巍交說舊長城雉堞雄聯耀列旌誰信憑陵新市賊重煩徵調羽林兵十年征戍愁難罷四海風塵望急清專閫何人高坐鎮得教莽莽陣雲平

捷書屢布又騰烽遙望甘泉隔萬重浪說天山三箭定幾聞函谷一丸封洞狻聯結書難喻瘴嶺崎嶇餉費供倉卒揮軍忘倒印不應還笑段司農

十萬黃標百紫標邊輸已竭末兵銷節持上將軍容壯營列平原地勢遼爭見棄城空甲兕底須殺賊始冠貂千秋嶺上白雲集 卷四 三

衛霍勳名在慨想元豐寶鼎朝

霏霏催動朔風來笳鼓聲淒畫角哀背水漫尋韓信壘籌邊誰築衛公臺鐵衣傳箭忙征騎白羽麾軍廢酒杯識得廟堂宵旰意折衝應薦不凡材

前觀打魚歌二首效杜

錦江之水通要津游魚出沒浪捲銀就中鱸鱖最稱貴跳波潑刺殊常鱗一網忽投大且密蛟龍失水疑無神牽萍帶苳尚騰躍霜腮雪鬣無纖塵已聞霍霍飛鸞刀戾天獨讓鳶飛高老饕張吻勢未已終愁釜底魂難逃柳條折得穿一一昨宵猶聽匏巴瑟雖然赤鯉幸躍出戲水羣鱗已

盡失

凌晨又聽漁榔集數罟之勢何其急澤梁有禁置弗聞可
堪復向汙池入紛紛漁子無饜心設餌張罾豈知戢跳波
白小方悠然條爾遭罹盡僵立別有大魚掉尾來游泳驚
失水一杯波濤怒翻自騰去中有雲氣隨風雷神龍變化
固莫測網羅雖密何爲哉回頭枯魚正相泣何能涸轍忘
其哀

後觀打魚歌仍用杜韻

漁人結網來東津橫流擁絕濤翻銀是何奇密漏不得一
舉直欲空凡鱗我從使君坐釣磯見之歎息驚鬼神就中
鯉魚本奇物何亦困阨罹風塵須臾已試庖人刀味美不
數伊魴高爾能變化尙鼎俎尋常鱗尾知焉逃鳴榔結纜
嶺上白雲集

卷四

三

況非一何處游鱗更聽瑟漢陰父老久忘機對此能無意
驚失

大網重見江潭集蹙湧浮鱗勢更急小魚跳避大魚驚觸
尾傷鱗欲盡入口腹之害知何窮濫淵焉望心能戢潛躍
已失波濤寬僵死那弗泥沙立昨者有客海上來爲我細
語傳深杯鱗鱠鯁不足數別有巨鯉騰風雷西江水到
會有日圍圍不樂何爲哉裂罾毀齮事宜早直待竭澤真
堪哀

寇警日逼送徐花橋赴粵

驚魂仍不定揮手送君行目斷吳門路心輕粵海程豈能
無後約難必是今生終望干戈息重來話舊盟

終

| | | |
|---|---|-----|
| 清 | 評 | 3 |
| 古 | 定 | 350 |

